

27 MAY 2000

Samy Vellu-Gaji

SAMY PERCAYA ISU GAJI BULANAN PEKERJA LADANG AKAN SELESAI

KUALA LUMPUR, 27 Mei (bernama) -- Presiden MIC Datuk Seri S.Samy Vellu berkata beliau percaya pemberian gaji bulanan untuk pekerja ladang di negara ini akhirnya akan menjadi kenyataan berikutan persetujuan pada dasarnya oleh kerajaan dalam hal itu.

Samy Vellu berkata Menteri Sumber Manusia Datuk Dr Fong Chan Onn mengambil berat isu itu dan beliau (Samy Vellu) difahamkan laporan mengenai gaji bulanan yang dimulakan beberapa bulan lalu kini dalam proses disiapkan.

"Apabila selesai laporan ini, beliau (Fong) akan membentangkan pada Jemaah Menteri untuk kelulusan. Saya harap dengan bantuan Perdana Menteri perkara ini dapat diselesaikan," katanya pada pemberita selepas perasmian Perhimpunan Agung MIC ke-54 di Pusat Dagangan Dunia Putra di sini.

Perdana Menteri Datuk Seri Dr Mahathir Mohamad ketika merasmikan Perhimpunan Agung MIC hari ini berkata kerajaan bersetuju pada dasarnya pemberian gaji bulanan kepada pekerja ladang.

Samy Vellu yang juga Menteri Kerja Raya berkata beliau telah menimbulkan isu gaji bulanan yang telah berlarutan lebih tiga dekad kepada Kabinet kira-kira tiga bulan lepas.

Menurutnya daripada sejumlah 300,000 pekerja ladang di negara ini, 39 peratus terdiri kaum India, 38 peratus Melayu dan selebihnya kaum lain dan pekerja asing.

Samy Vellu berkata sektor perladangan getah di negara ini mungkin tidak menghadapi masalah kekurangan pekerja jika para pemilik ladang di negara ini melaksanakan beberapa cadangan dalam penyelidikan-penyelidikan yang dijalankan.

Antara penyelidikan itu ada yang telah mencadangkan sistem moden yang membolehkan seorang pekerja menoreh 5000 pokok dalam seminggu, katanya.

"Ini mengikut sistem moden, tapi saya dapat tahu pihak majikan tidak berminat untuk menggunakan sistem ini," katanya.

Katanya masalah penting masyarakat India seperti kemudahan untuk sekolah Tamil, penempatan semula setinggan, perumahan dan gaji bulanan pekerja ladang telah timbul di abad lepas dan perlu diselesaikan agar tidak berlarutan sehingga ke abad ke-22.

-- BERNAMA

RV RHM